



Inatsisartuni ilaasortaq, Siumut  
Anders Olsen  
– MAANI

## Mellembølge pillugu § 37 naapertorlugu apeqqummut akissut

11. juni 2012  
Sagsnr. 2012-066687  
Dok. Nr. 928275

Asasara Anders Olsen

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Mellembølgekkut nassitsissutit pillugit apeqquinnut qujanarsuaq. Oqaatigisattut upernaakkut ataatsimiinnermi isumaqatigiissutigineqarpoq, mellembølgemut atortut taartigisinnaasai suunersut misissorneqassasut. Tamatumunnga atatillugu akileraartartut aningaasaataat naapertuuttumik atorlugit, tamatumalu peqatigisaanik innuttaasut KNR radiomik tusarnaarnissamat pisariaqartitaat naammassillugit aaqqiissutissanik nassaarnissaq Naalakkersuisut pingaartittorujussuuat. Apeqqutitit matuma kinguliani tulleriillugit akineqarput.

- 1) **Mellembølge atorlugu nassitsissutip siorna atorunnaarsinneqarsimasup taartissarsiorniarlugu Naalakkersuisut periarfissanik misissuinerisa nalaanni ukiamullu nassuiaammik saqqummiussinissaasa tungaanut mellembølgegetoqqap arlaatigut uterfigalugu atoqqikkallarsinnaanerata periarfissaasinnaanera Naalakkersuisut qanoq ilisimasaqarfigaat?**

Allaffeqarfimma apeqquinnut akissuteqarnissamat atatillugu TELE Greenland (TELE) attaveqarfigaa, tassangaanniillu imatut ilisimatitsisoqarpoq:

### Mellembølgekkut MB-radiofoniimut sullissivitoqqat taakkulu qanoq issusii

MB radiofoniitoq, 2011-mi DVB-T-p nuna tamakkerlugu pilersinneqarneranut atatillugu matuneqartoq tallimanik atortoqarpoq. MB-radiofoniimut nassitsissutit Upernavimmut, Ummannamat, Qeqertarsuarmut, Nuummumut (Telegraf Øen) kiisalu Simiutamut inissitaapput.

Atortut tamarmik 1958-imiit 1978-imut ikkussuunneqarsimapput – kisiannili atortut napparutaat pingaaneq Nuup eqqaaniittoq 2001-imi taarserneqarpoq. Taamaattumik antenneqarfiit tamarmiusut amerlanersaat 2011-mi matusinermi ukiut 30-it sinnerlugit pisoqaassuseqarput. Piffissami tassani TELE-p atortunik ingerlatsiinnarnissaa pisinnaasimavoq, antenneqarfiit (napparutit, jordnetit, sukat oqimaaloquttat il.il.), kiisalu nassitsinermut atortut ingerlaavartumik nalinginnaasumik aserfallatsaalineqarsimammata.

Erseqqissaatigineqassaaq, antenneqarfinnut tamanut aallaqqaammumut qisuit napparutit qitiusumik nappatutit atorneqartarsimammata, kiisalu jordnetinut sukat oqimaaloquttat atorneqarsimallutik.

Napparutit taakku kiisalu ledningit kanngussa atorneqartut ukiut 30-it sinnerlugit pisoqaassuseqarput, taamaattumillu taakku aserfallatsaalineqaannarnissaat ajornarsisimalluni. Taamaattumik atuineq ingerlannassappat annertoorsuarmik iluarsaassisoqartariaqarpoq, taakkulu nutaanik sanaartorerup naleqatigisussaavai, napparutit qisuusut tamarmik napparutinik saviminernik nutaaliaasunik taarsersorneqartussaammata.

Nuummi atortuni napparut qitiusoq 2001-imi napparummik saviminernik taarserneqarpoq, tassanilu jordnetitoq ukiut 30-it sinnerlugit pisoqaassusilik, sukanik oqimaaloqutalik atoqqinneqarpoq.

Kiisalu erseqqissaatigineqassaaq, antenneqarfitoqqat pisoqalisimasut aserfallatsaalineqaannassappata atortuni taamaattuni sulinissamut inatsisit maleruagassallu, aammalu assigiissaakkamik suleriaasissat atuuttut naammassineqarsinnaanngimmata.

#### Upernavimmi MB-Radiofoniimut atortut

Upernavimmi MB-Radiofoniimut atortut atorneqarunnaarput. Tassalu nassitsissutitoqqat suli Upernavimmiipput, kisiannili antenneqarfiup atortui pingaamerit allangortiterneqarsimapput, aammalu sinerissami radiumut sumiissusersionermullu antenneqarfittut atorneqarlutik.

Upernavimmi MB-Radiofoniimut atortunik ammaaqqikkallartoqarsinnaanngilaq, ammaaqqittoqassappat minnerpaamik antenneqarfimmik nutaamik pilersitsinissaq pisariaqartinneqarmat. Antenneqarfik nutaaq 1,5 aamma 2 mio. koruunit akornanni aningaasartuuteqarfiussatut nalilernerpoq. Erseqqissaatigineqassaaq, ammaaqqittoqassappat tikititsinissamut piffissaq atorneqartussa q pissutigalugu tamanna siusinnerpaamik 2013-imi pisinnaammat.

#### Uummannami MB-Radiofoniimut atortut

Uummannami MB-Radiofoniimut atortut tamakkiisumik atorunnaarput. Tassalu nassitsissutit peerneqarsimapput iginneqarsimallutillu, kiisalu antenneqarfiit allangortiterneqarsimapput, sumiiffillu Sinerissami Radioqarfiup sullissiviata antenneqarfiatut atoqqinneqarpoq.

Uummannami MB-Radiofoniimut atortunik ammaaqqikkallartoqarsinnaanngilaq.

-

#### Qeqertarsuarni MB-Radiofoniimut atortut

Qeqertarsuarni MB-Radiofoniimut atortut atorunnaarput, kisiannili nassitsissutit taamatullu antenneqarfik suli pigineqarput. Kisiannili erseqqissaatigineqassaaq antenneqarfiup – ukiut 30-it sinnerlugit – pisoqaassuseqarnera pissutigalugu atorsinnaassusisata killeqarmat TELE-p ingerlatsineq qulakkeersinnaassappagu, kiisalu inatsisit atuuttut malinneqarsinnaassappata annertuumik iluarsaassinissaq pisariaqartoq.

Atortut maanna atorsinnaassuseqarnerat tunngavigalugu ingerlatsisoqarsinnaavoq, kisiannili matuma siuliani allassimasut naapertorlugit tutsuiginartumik ingerlatsinissaq qulakkeerneqarsinnaanngilaq, atortullu ajoquteqalerpata piffissami siviisuumi ingerlatsineq uninngatinneqartariqartussaavoq. Atortut ingerlatikkallarnejarnissaanut iluarsaassinissamut aningaasartuutissat 100-200.000 koruuninut missiliorneqarput, taakkulu saniatigut ingerlatsinermut aningaasartuutit nalinginnaasut ilanngunneqartussaapput.

Atortut tutsuiginartumik ingerlanissaat TELE-p qulakkeersinnaassappagu, antenneqarfik annertuumik iluarsaanneqartariaqarpoq. Taanna 1,5 aamma 2 mio. koruunit akornanni aningaasartuuteqarfiussatut nalilerneqarpoq. Tamanna siusinnerpaamik 2013-imi pisinnaavoq.

#### Nuummi (TLGØ) MB-Radiofoniimut atortut

Nuummi MB-Radiofoniimut atortut atorunnaarput, kisiannili nassitsissutit taamatullu antenneqarfik sulii pigineqarput. Kisiannili erseqqissaatigineqassaaq antenneqarfimmi atortut ukiut quliniit 30-it sinnerlugit pisoqaassuseqarnerat pissutaalluni atortut atorsinnaassuseqarnissaat TELE-p qulakkeersinnaassappagu, kiisalu inatsisit atuuttut malinneqarsinnaassappata annertuumik iluarsaassinissaq pisariaqartussaasoq.

Atortut maanna qanoq issutsitik pissutigalugit ingerlalersinnaanngillat, antenneqarfik annertuumik iluarsaanneqartariaqarmat, tassungalu pingaartumik napparutit qisuit 15 meterinik portussusillit, jordnetimut sukatur oqimaaloquttatut atorneqarsimasut ilaatinneqarput. Taamatut suliarineqarnissaat aalajangerneqassappat tutsuiginartumik ingerlatsinissaq qulakkeerneqarsinnaanngilaq, , atortullu ajoquteqalerpata piffissami sivilu ingerlatsineq uninngatinneqartariqartussaavoq.

Atortut ingerlagallartussanngorlugit iluarsaannissaannut aningaasartuutissat 200-400.000 koruuninut missiliorneqarput, taakkulu saniatigut antenneqarfiup ataatsimut isigalugu qanoq issusia pissutaalluni ingerlatsinermut aningaasartuutit qaffasissut aningaasartuutigineqartariaqartussaapput.

Atortut tutsuiginartumik ingerlanissaat TELE-mit qulakkeerneqarsinnaassappat, Qeqertarsuarmi atortunik annertuumik iluarsaassinissap assinganik iluarsaassisoqartariaqarpoq.

#### Simiutami MB-Radiofoniimut atortut

Simiutami MB-Radiofoniimut atortut atorunnaarput. Tassalu nassitsissutitoqqat sulii sakkortusaaveqarfimmiippat, kisiannili antenneqarfiup atortui pingaarnit allanngortiterneqarsimappat, aammalu sinerissami radiumut sumiissusersionermullu antenneqarfittut atorneqarlutik.

Simiutami MB-Radiofoniimut atortunik ammaaqikkallartoqarsinnaanngilaq, ammaaqittoqassappat minnerpaamik antenneqarfimmi nutaamik pilersitsinissaq pisariaqartinneqarmat, antenneqarfillu nutaaq 1,5 aamma 2 mio. koruunit akornanni aningaasartuuteqarfiussatut nalilerneqarpoq. Erseqqissaatigineqassaaq, ammaaqittoqassappat tikititsinissamut piffissaq atorneqartussa qissutigalugu tamanna siusinnerpaamik 2013-imi pisinnaammat.

#### Ingerlatsinermut aningaasartuutit

Karl Lyberth-ip § 37 naapertorlugu apeqqutaata nr. 2011-32-ip akineqarnerani TELE ilisimatitsivoq, MB-Radiomut atortunut aningaasartuutit 2009-mi 3,1 mio. koruuniusimasut. Taamaattumik tamanna tunngavigalugu atortunit tallimaasunit marluk ingerlanneqarnerinut aningaasartuutit ukiumut 1,2 mio. koruunit missaannut naatsorsorneqarsinnaapput.

#### Eqikkaaneq

0,3 – 0,6 mio. koruunit akornanni aningaasartuutigalugit Qeqertarsuarmi Nuummilu MB-Radiofoniimut atortut ingerlagallartussanngorlugit ammarneqarsinnaapput. Kisiannili atortut marluk taakku tutsuiginartumik ingerlanissaat qulakkeerneqarsinnaanngilaq.

Tamatuma saniatigut ingerlatsinermut aningaasartuutit ukiumut 1,2 mio. koruuniusussaapput.

Atortut taakku marluk ingerlagallartussanngortinneqarpata, aallaqqaammut angusinnaasat 75 – 80%-ii matussuserneqarsinnaalissasut naliliisoqarpoq, erseqqissaatigineqassarli tutsuiginartumik ingerlatsinissaq matussusiisinaanissarlu qulakkeerneqarsinnaanngimmat.

**2) Periarfissaqarsimassappat Naalackersuisut qanoq piumassuseqartigippat nassitsissutitoqqap atoqqikkallarnissaanut taamaalillunilu aaqqiigallarnissamik aqutissiusseqataanissamut?**

Apeqqut 1-imut akissummi takuneqarsinnaasutut, mellembølgekkut nassitsissutit tamarmik ammaqqikkallarneqarnissaat ajornarpoq. Siornatigut nassitsissutaasimasunit tallimaasunit marluk kisimik ammaqinneqarsinnaapput. Ammaaqqinnermi aaqqiissutissamik nutaamik nassaartoqarnissaata tungaanut ingerlaavartumik ingerlatsinissaq qulakkeerneqarsinnaanngilaq. Taamaattumik innuttaasut KNR radiomik tusarnaarsinnaaginnarnissartik qulakkeeqqasinnaanngilaat. Naalackersuisut isumaqarput, mellembølgekkut nassitsissutit ammaqinneqassappata, innuttaasut ingerlatsinermut qulakkeerivigineqartariaqartut. Tamanna pissutigalugu Naalackersuisut isumaqarput, mellembølgekkut nassitsissutit ammaqinnissaat piviusorsiuunngitsoq.

Tassalu Naalackersuisut isumaqarput, suliniutinik aallartitsisoqavitsinnagu nassuiaasiassaq, Inatsisartut suliarineqartussatut kissaatigisaat piareerneqaaqqaartariaqartoq.

Inussiarnersumik inuulluaqqusillunga

Jens B. Frederiksen